

Danskit naalagaaffianni innuttaasunut il.il. passi pillugu inatsimmik nalunaarut

Matumuuna danskit naalagaaffianni innuttaasut il.il. passeqartarnerannik inatsit nalunaarutigineqarpoq, takuuk inatsimmik nalunaarut nr. 586, 1. september 1986-imeersaq, inatsit nr. 386, 20. maj 1992-imeersumi § 6, inatsit nr. 288, 12. maj 1999-imeersumi § 6, inatsit nr. 1103, 29. december 1999-imeersumi § 2, inatsit nr. 433, 31. maj 2000-imeersumi § 12, inatsit nr. 387, 28. maj 2003-meersumi § 2, inatsit nr. 551, 24. juni 2005-imeersumi § 2, inatsit nr. 557, 24. juni 2005-imeersumi § 2, inatsit nr. 1565, 20. december 2006-imeersumi § 2 aamma inatsit nr. 1587, 20. december 2006-imeersumi § 8-miittut allannguutit malitsigisai ilanngullugit.

Nalunaarutigineqarsimasumi inatsisip oqaasertai aatsaat atuutilissapput ulloq 1. juli 2009-minngaanniit § 4 a, imm. 1 aamma 3-mut tunngasut, takuuk § 19, imm. 1 inatsit nr. 1587, 20. december 2006-imeersumi (Soraarnerussutisiaqalernissamut aamma pensionisiaqalernissamut ukiut amerlisikkiartuaarneqarnerisa il.il. kingunerannik allannguutit), nalunaarutip naalernerani ilannguteqqinneqartut.

§ 1. Kunngip peqqussutaatigut aalajangerneqarsinnaavoq, danskisut innuttaassusillit nunamut tikinnerminni imaluunniit nunamit aallarnerminni passimik imaluunniit angalanermi kinaassutsimut uppernarsaatiniq peqartassanersut.

Imm. 2. Justitsministeri danskit naalagaaffianni innuttaasunut passitaartitsinermut malittarisassat ersarinnerusut aalajangiissaaq.

Imm. 3. Justitsministeri kommunalbestyrelsinut passimik qinnuteqarnernut atatillugu suliassanik inissiigallarsinnaavoq.

Imm. 4. Justitsministeri suliassat annertussusaat pillugu ersarinnerusunik aalajangersaasinnaavoq, imm. 3 naapertorlugu kommunalbestyrelsinut nuutsinneqarsinnaasut.

Imm. 5. justitsministeri aalajangiinerit naammagittaalliuutigineqarsinnaanerannut malittarisassanik aalajangiisinnaavoq, kommunalbestyrelsiminngaanniit imm. 3 malillugu pisinnaatitaaffitsik naapertorlugu aalajangerneqarsimasunut, kiisalu aalajangiinerit § 2, imm. 1 naapertorlugu politiinit aalajangerneqarsimasunut, aamma § 1, imm. 2 naapertorlugu malittarisassaliarineqarsimasunut, tassunga ilaalluni aalajangiinerit ministerimut anngunneqartarsinnaanginnissaat.

§ 2. Politiit danskit naalagaaffianni innuttaasumut passimik tunniussiumangissinnaapput imaluunniit passereriigaanik atorunnaarsitsisinnaapput pissutsini imaattuni:

- 1) pineqartoq pillarneqaataasussamik unnerluutigineqarsimappat, kiffaangissusiagaanermik kinguneqartinneqarnissaa ilimagineqarsinnaalluni, aamma suliap sumiiffia pissutaalluni imaluunniit unnerluutigineqartup pissusaata ilimanarsitippagu, akisussaaffimminik qimarratiginnilluni nunamit aallarnissaa imaluunniit nunami allamiiginnarniarnissaa,
- 2) pineqartoq kiffaangissusiagaalluni eqqartuunneqarsimappat, suli pillaatissartaa atorsimanagu, imaluunniit pillaatitut akiligassinneqarsimappat imaluunniit arsaarinnissuteqarfigineqarsimappat, suli tunniunneqarsimangitsunik, imaluunniit taakkununga qularnaveeqqutit suli pissarsiarineqarsimanatik, aamma suliap sumiiffia pissutaalluni imaluunniit unnerluutigineqartup pissusaata ilimanarsitippagu, akisussaaffimminik qimarratiginnilluni nunamit aallarnissaa imaluunniit nunami allamiiginnarniarnissaa,

- 3) pineqartup nunamut allamut aallarnissaa inatsimmi aalajangersakkanut akerliussappat, inuup nunami maaniinnissaanut qulakkeerinissamik siunertaqartunut, taassuma pisortanut imaluunniit namminersortunut pisussaaffimminik eqquutitsinissaata tungaanut.

Imm. 2. Imm. 1 naapertorlugu atorunnaarsitsineq politiinit aalajangerneqarsimasoq, passitaarniarnermut itigartitaasumit imaluunniit passimik arsaarneqarsimasumit piumasarineqarsinnaavoq eqqartuussivimmut aalajangiiffigisassanngorlugu tunniunneqarnissaa. Eqqartuussisunut piunnaasaqat politiit sivitsorsaataasinnaasumik uninngateqqaarnagu eqqartuussivimmut anngutissavaat, eqqartuussissuteqarnermikkut sapinngisaminnik piaartumik aalajangiisussaasunut, politiit aalajangigaat attatiinnarneqassanersoq imaluunniit atorunnaarsinneqassanersoq. Pineqartoq nunami allamiippat, politiit, passip arsaarinnissutigineqannginnerani, eqqartuussiviup aalajangerneqarsimasumik akuersissuteqarnerannik qinnuteqaqqaassapput.

Imm. 3. Imm. 1, nr. 1-imi pissutsini taaneqartuni eqqartuussisunut piunnaasaqat tunniunneqassaaq eqqartuussivimmut, paarnaarussinissaq pillugu aalajangiinerup sorliussanera eqqartuussisarnermik inatsimmiittoq naapertorlugu § 781¹⁾ aalajangerneqassanersoq, imm. 1, nr. 2-mi pissutsini taaneqartuni eqqartuusseqqartoq²⁾, pillaanermik suliami siulliulluni eqqartuussisuusimasoq, imaluunniit tassani suliap suliarineqarfissarigaluani, eqqartuusseqqaarfimmi eqqartuunneqareersimaguni.³⁾ Imm. 1, nr 3-mi pissutsini taaneqartuni eqqartuussisunut piunnaasaqat tunniunneqassaaq eqqartuussisarnermik inatsimmiittumi § 698-imi eqqartuussivimmut taaneqartumut. Aammattaaq suliap suliarineqarnerani eqqartuussisarnermik inatsisip atuagartaasa sisamaanni (4. bog) sakkukillisaanerit pisariaqartut atorneqarnissaannik malittarisassat atuupput.

§ 2 a. Meeraq 15-it ataallugit ukiulik namminerisaminik passilik imaluunniit namminerisaminik angalernermi kinaassutsimut uppersaartilik, meeqqamut angajoqqaatut oqartussaaffiginnittu-mit/-nit piunnaasaqatigineqarsinnaavoq inuit allat passiannit peerneqarnissaa.

Imm. 2. Imm. 1 malillugu aalajangiineq politiinit aalajangerneqassaaq. Politiit passimik arsaarinnikkallarsinnaapput tassani meeqqap allanneqarsimasup peernissaa siunertaralugu, takuuk imm. 1. Tamatumunnga Justitsministeri malittarisassanik ersarinnerusunik aalajangersaasinnaavoq.

Imm. 3. Imm. 2 malillugu politiit aalajangiinerat aqqissuusinermik oqartussanut allanut tunniunneqarsinnaanngilaq.

§ 3. Unnuisarfiit, aasaanerani unnuisarfiit, akunnittarfiit, pensionatit, unnuiffiit (vandrehjem) assigisaallu inisimasut unnuisartut allattaavinnut akuerisaasunut allattuisarnissaat pillugu justitsministeri ersarinnerusumik aalajangersagaliorsinnaavoq unnuisut atiisa, suliffiisa najugaasalu nalunaarnerat ilanngullugu. Allattaaviit qaqugukkulluunniit politiinit misissorneqarsinnaassapput, immersorneqarnerminniillu minnerpaamik ukiut 2-t toqqortarineqassallutik.

Imm. 2. Allattaavinnut allattuisartussaataaneq unnuisitsisumiippoq. Unnuisoq pineqartoq imm. 1-imi paasissutissanik taaneqartunik tunniussisussaataavoq.

§ 4. Inuk kinaluunniit – justitsministerip aalajangiineratut, aamma malittarisassat ersarinnerusut aalajangersimasai malillugit – pisussaaffeqarpoq nunamut tikinnermini imaluunniit aallarnermini passinik misissuisarfimmut nalunaassalluni passernilu imaluunniit angalanermi kinaassutsimut uppersaataini alla takutissallugu.

Imm. 2. Umiarsuit naalagaat aamma timmisartut naalagaat, justitsministerimit passit misissorneqarnissaata suliarineqarnissaannut najoqqutassaliariumaagassaanik suliaqarnissaminnut pisussaaffeqarput.

§ 4 a. Passitaarnermut inuit 18-ileereersimasut, kisianni suli pensionernissamut ukiorisassanik ukioqalersimangitsut, takuuk social pension pillugu inatsimmi § 1, 600 kr.-mik akiliisapput.⁴⁾

Imm. 2. Ataatsimoorussamik passitaarnermut 600 kr.-mik akiliisapput.

Imm. 3. Passitaarnermut inuit pensionernissamut ukiorisassaminnik ukioqalersimasut, takuuk social pension pillugu inatsimmi § 1, 350 kr.-mik akiliisapput.⁵⁾

Imm. 4. Passitaarnermut inuit, 18-it ataallugit ukiullit 115 kr.-mik akiliisapput.

Imm. 5. *Imm.* 1-4 aamma atuuppoq passimik taarsiinermi, saniatigut passitaaqqinnermi aamma atuussinnaaffiani nutaamik passitaarnermi. Taamaattorli nutaamik passitaartitsisoqartarpoq akiliisitsinani, passi pissutsini, passitaartitsinermi oqartussaasut peqqutaallutik passi amigaateqangaatsiarpat.

§ 5. Matuminnga inatsimmik imaluunniit taakku naapertorlugit aalajangersakkanik unioqutitsisoq akiliisitaanermik imaluunniit qaammatit 6-it paarnaarunneqarnermik pillarneqassaaq.

Imm. 2. Assinganik pillarneqartussatut isigineqarpoq

- 1) oqartussanut passitaartitsisartunut piaaraluni paasissutissanik eqqunngitsunik imaluunniit peqqusersusaartumik nipangiussilluni pissusissamisuumngitsumik passitaarsimasoq imaluunniit angalanermi kinaassutsimut uppernarsaatissarsisimasoq imaluunniit pisuussutigisaanik, passitaavani imaluunniit angalanermi kinaassutsimut uppernarsaataani ativiginngisaa ullorlu inunngorfiginngisaa allaqqalersimasut,
- 2) inatsisinik unioqutitsinissamik siunertaqarluni nammineq atini atorlugu arlalinnik passitaartoq imaluunniit angalanermut kinaassutsimut uppernarsaatinik pissarsisoq,
- 3) inatsisinik unioqutitsissamik siunertaqarluni passip imaluunniit angalanermi kinaassutsimut uppernarsaatip ilaanik imaluunniit tassaniittunik allattukkanik allannortitsisoq piiasorluunniit,
- 4) passinik misissuisarfiit avaqqullugit nunamut isertoq imaluunniit nunamit anisoq.

§ 6. Matuminnga inatsimmik unioqutitsinermik suliat politiit suliassaatus suliarineqassapput.⁶⁾

Imm. 2. Eqqartuussisarnermut inatsimmi kapitali 68-imi (arsaarinninneq), kapitali 69-imi (uppernarsaatissanik ujarlerfiginninneq), kapitali 71-imi (tigusarinninneq) aamma kapitali 72-imi (paarnaarussineq)⁷⁾ pineqartut eqqartuussisarnermi kinguneritinneqartartut matuminnga inatsimmik unioqutitsisoqarpat atorneqassapput soorlu suliani, malittarisassat nalinginnaasut malillugit eqqartuussisarnermi inatsisini naalagaaffiup eqqartuussisuserisuanut malersugassanngortinneqartartut.

Imm. 3. Inatsit manna naapertorlugu akiliisitsinerit akuersissutigineqarsimasut imaluunniit eqqartuussissutigineqarsimasut naalagaaffiup karsianut pissapput.

§ 7. Justitsiministerip aalajangiineratigut paasissutissat, matumani inatsimmi pissutsini pineqartuni qinnuteqaateqarnermut atatillugu tunniunneqaqqusaasut, pissutsinut ilumoorluinnarluni tunniussinissamik piumasaqaataavoq.

§ 8. Manna inatsit aamma Kalaallit Nunaannut atuuppoq, taamaattorli §§ 5-7-mut tunngasuni killilersuutaasut allannguutillu, pissutsit immikkut ittut Kalaallit Nunaanni inatsisit atuuttut kingunerisaannik. Inatsit atuutilerpoq ulloq 1. januar 1953. Peqatigitillugu § 56-imi Savalimmiuni naalagaaffimmut akiliutaasartumut malittarisassaq 30. marts 1836-imeersoq aamma naqitaq 15. maj 1839-imeersoq angalanermi passitaartitsinissamut inerteqqut pillugu ersarinnerusumik aalajangersakkanik imaqartoq atorunnaarsinneqarpat.

Justitsministereqarfiup susassaqrifiini (Akiliisitsisarnissamut aalajangersakkat)⁸⁾ inatsisit aalajangersimasut allannguutaat pillugit inatsit nr. 386, 20. maj 1992-imeersoq aalajangersakkamik imaattumik imaqarpoq:

§ 13

Imm. 1. Inatsit Savalimmiunut aamma Kalaallit Nunaannut atuutinngilaq.

Imm. 2. § 2, §§ 4-7 aamma § 9 kunngip peqqussutaatigut Savalimmiunut aamma Kalaallit Nunaannut atuutilersinneqarsinnaavoq, Savalimmiuni Kalaallit Nunaannilu pissutsit immikkut ittut allaassutigititasaat allaassutigalugit.⁹⁾

Arbejdsmarkedets Tillægspension pillugu inatsisip, Lønmodtagernes Dyrtidsfond pillugu inatsisip aamma inatsisip allat assigiinngitsut (Utoqqalinersiaqalertarnermut ukiut 67-imiit 65-imut appartinneqarnerisa kingunerisaanik allannguutit)¹⁰⁾ allanngortinneri pillugit inatsit nr. 288, 12. maj 1999-imeersoq aalajangersakkamik imaattumik imaqarpoq:

§ 18

Imm. 1. Inatsit Savalimmiunut aamma Kalaallit Nunaannut atuutinngilaq, takuulli imm. 2 aamma 3.

Imm. 2. § 6¹¹⁾ kunngip peqqussutaatigut Savalimmiunut aamma Kalaallit Nunaannut atuutilersinneqarsinnaavoq, Savalimmiuni Kalaallit Nunaannilu pissutsit immikkut ittut allaassutigititassaat allaassutigalugit.

Imm. 3. (Ilanngunneqanngilaq)

Eqqartuussivimmu akiliisarnermut inatsisip aamma passimut inatsisip (Inuinnaat suliassaataanni aningaasartuutitut tunngatillugu akit aamma inersimasut passitaarnermut akiliutigisartagaasa allisinneqarnerat)¹²⁾ allanngornera pillugu inatsit nr. 1103, 29. december 1999-imeersoq aalajangersakkamik imaattumik imaqarpoq:

§ 4

§ 2¹³⁾ Savalimmiunut aamma Kalaallit Nunaannut atuutinngilaq, kisianni kunngip peqqussutaatigut Savalimmiunut aamma Kalaallit Nunaannut atuutilersinneqarsinnaavoq, Savalimmiuni Kalaallit Nunaannilu pissutsit immikkut ittut allaassutigititassaat allaassutigalugit.

Pillaatit naammassineqarnissaannik il.il. pillugit inatsisip suliarineranut atatillugu inatsisip aalajangersakkat assigiinngitsut allannguutaat pillugit inatsit nr. 433, 31. maj 2000-meersoq (Pillaatit naammassineqartarnat pillugu inatsisip, pillaalluni parnaarussigallarnertarnerup atorunnaarsinneqarnerata aamma inuunermik sinnera parnaarussat misiligummik iperagaasarnerisa kingunerannik allannguutit)¹⁴⁾ atuutilernermut atatillugu aalajangersakkanik imaattunik imaqarpoq:

§ 30

Inatsit atuutilerpoq ulloq 1. juli 2001.

§ 31

Imm. 1. Inatsisip atuutilersinneqarnerata kingorna §§ 1-29-mi inatsisinik taaneqartunik siusinnerusukkut unioqquutitsinernut pillaaasoqassappat, tassunga ullut 30-it angullugit pillagassaasumut, parnaarussaaniissamut eqqartuunneqassaaq parnaarussaagallarnerup ulluisut amerlatigisumik.

Imm. 2. Parnaarussaagallarnermik pillarneqarnermit sakkortunerusumik imm. 1-imi taaneqartumit pillaaasoqartussaappat, sakkukinnerusumik parnaarussinermik eqqartuussisoqarsinnaavoq, taamaattorli ullunit 30-init sivikinnerunngitsumik imaluunniit qaammatinit 4-nit sivisunerunngitsumik.

§ 32

(Ilanngunneqanngilaq)

§ 33

Imm. 1. Inatsimmik unioqquutitsinermut tunngatillugu pillaanerup akiliisitsininngortinneqarneranut aalajangiinermi, inatsisip atuutilernissa sioqqullugu piliarineqarsimasumut, assinganik § 31 atuuppoq.

Imm. 2. Inatsit sunniuteqanngilaq parnaarussaagallarnermik pillaanermit imaluunniit parnaarussaagallarnermik pillaanermik allanngortitamut, inatsisip atuutilernissaa sioqqullugu eqqartuussissutigineqarsimasumut imaluunniit aalajangerneqarsimasumut.

§ 34

Imm. 1. Inatsit Savalimmiunut aamma Kalaallit Nunaannut atuutinngilaq.

Imm. 2. §§ 1, 3, 5-8, 10, 12, ¹⁵⁾ 14, 15, 17, 18 aamma 27 kunngip peqqussutaatigut tamarmiulluni imaluunniit ilaannakortukkaartumik Savalimmiunut atuutilersinneqarsinnaavoq, Savalimmiuni pissutsit immikkut ittut allaassutigigitassa at allaassutigalugit.

Nunat tamat akornanni angajoqqaatut piginnaatitaaffiit pillugit aalajangiisarnernik naammassinnittarnerit il.il. (nunat tamat akornanni meeqqanik aallarussisarnerit) pillugit inatsisip allannguutaat pillugit inatsimmi nr. 387, 28. maj 2003-meersoq, danskisut innuttaassuseqartut il.il. passitaartarnerat pillugu inatsit, nunani allamiut pillugit inatsit aamma aappariilersarneq aappariikkunnaartarnerlu pillugit inatsit (Meeqqanik aallarussinermik suliani eqqartuussisutigoortitsinermi ikiorteqarteqarnissamut aaqqissuusinermit il.il.)¹⁶⁾ aalajangersakkamik imaattumik imaqarpoq:

§ 6

Imm. 1. Inatsit Savalimmiunut aamma Kalaallit Nunaannut atuutinngilaq.

Imm. 2. Inatsit imaluunniit taassuma ilai kunngip peqqussutaatigut Savalimmiunut aamma Kalaallit Nunaannut atuutilersinneqarsinnaavoq, Savalimmiuni Kalaallit Nunaannilu pissutsit immikkut ittut allaassutigigitassa at allaassutigalugit.

Aqqusinertigut angallanneq pillugu inatsisip aamma passi pillugu inatsisip allanngortinnera pillugu inatsit nr. 557, 24. juni 2005-imeersoq (Knallertit, ingerlaarnermut aamma piffissami

qasuersaarfissami aamma meeqqat passiinut akiliutaasartup appartinneqarnera il.il.)¹⁷⁾
atuutilertermut atatillugu aalajangersakkanik ukuninnga imaqqarpoq:

§ 3

Imm. 1-4. (Ilanngunneqanngilaq)

Imm. 5. § 2 ¹⁸⁾ Lovtidendemi nalunaarutigineqarnerata aqaguani atuutilissaaq atuutissallunilu ulloq 1. oktober 2004-miit.

§ 4

Inatsimmi § 2 Savalimmiunut aamma Kalaallit Nunaannut atuutinngilaq, kisianni kunngip peqqussutaatigut Savalimmiunut aamma Kalaallit Nunaannut atuutilersinneqarsinnaavoq, Savalimmiuni Kalaallit Nunaannilu pissutsit immikkut ittut allaassutigigitassaat allaassutigalugit.¹⁹⁾

Arbejdsmarkedets Tillægspension aamma inatsisit allat assigiinngitsut pillugit inatsisip allannguutaa pillugu inatsit nr. 1587, 20. december 2006-imeersoq (Soraarnerussutisiaqalertarnermut aamma pensionisiaqalertarnermut ukiut qaffatsikkiartuaarneqarnerisa kingunerisaanik allannguutit il.il.)²⁰⁾ atuutilertermut atatillugu aalajangersakkamik imaattumik imaqqarpoq:

§ 19

Imm. 1. Inatsit atuutilerpoq ulloq 1. juli 2009, takuulli imm. 2-7.

Imm. 2-7. (Ilanngunneqanngillat)

Justitsministeria, ulloq 8. september 2008

LENE ESPERSEN

/Anette Arnsted

-
- 1) Eqqartuussisarnermik inatsisip il.il. allannguutaa pillugu inatsit nr. 243, 8. juni 1978-imeersukkut (Sulianik pillarneaataasinnaasunik misissuisarneq, tigusarinninneq aamma parnaarussivimmi tigummigallaasarneq, eqqartuussivimmi pillaataniissamik siunertaqartunut tunngasunik suliaqarnermi atatillugu taarsiissuteqartarneq, tassunga ilaalluni ingerlatsisinnaanermik piginnaatitsissummik il.il. arsaarinninneq imaluunniit atorunnaarsitsineq) eqqartuussisarnermik inatsimmi aalajangersagaq taamanikkut atuuttoq § 781 atorunnaarsinneqarpoq. Maanna suliani suli misissuiffigineqartuni eqqartuussisoqarfik suliap suliarineqarfissaa eqqartuussisarnermik inatsisip § 694-iani aalajangersarneqarpoq. Isumaqatigiinniarnep pingaarnersaani eqqartuussisoqarfik suliap suliarineqarfissaa eqqartuussisarnermik inatsisip kapitaliisa 63-iani malittarisassat malillugit aalajangersarneqarpoq.
 - 2) Eqqartuussisarnermik inatsisip il.il. allannguutaa pillugu inatsit nr. 260, 8. juni 1979-imeersukkut (Inuinnaat suliassaataannik il.il. suliaqartarneq) oqaaseq ”eqqartuusseqqaarfik” eqqartuussisarnermik inatsimmi tamarmi allanngortinneqarpoq ” eqqartuussivik”-imut.
 - 3) Nalunaarsugaq 2 takuuk.
 - 4) Oqaatsit atorneqartut nalunaarneqarsimasut § 4 a, imm. 1 atuutilerpoq ulloq 1. juli 2009, takuuk § 19, imm. 1, Arbejdsmarkedets Tillægspension aamma inatsisit allat assigiinngitsut pillugit inatsisip allannguutaa pillugu inatsit nr. 1587, 20. december 2006-imeersoq (Pensionisiaqalertarnermut aamma soraarnerussutisiaqalertarnermut ukiut il.il. qaffatsikkiartuaarneqarnerisa kingunerisaanik allannguutit). Tamanna tikillugu aalajangersakkami oqaatsit atorneqartut imaapput: “Passitaarnermut inuit 18-ileereersimasut, kisianni suli 65-inik ukioqalersimanngitsunut, inunnut ulloq 1.juli 1939 sioqqullugu inunngorsimasunut taamaattorli 67-inik ukiulinnut, 600 kr. akiliutigineqassapput.”
 - 5) Oqaatsit atorneqartut nalunaarneqarsimasut § 4 a, imm. 1 atuutilerpoq ulloq 1. juli 2009, takuuk § 19, imm. 1, Arbejdsmarkedets Tillægspension aamma inatsisit allat assigiinngitsut pillugit inatsisip allannguutaa pillugu inatsit nr. 1587, 20. december 2006-imeersoq (Pensionisiaqalertarnermut aamma soraarnerussutisiaqalertarnermut ukiut il.il. qaffatsikkiartuaarneqarnerisa kingunerisaanik allannguutit). Tamanna tikillugu aalajangersakkami oqaatsit atorneqartut imaapput: “Passitaarnermut inuit 18-ileereersimasut, kisianni suli 65-inik ukioqalersimanngitsunut, inunnut ulloq 1.juli 1939 sioqqullugu inunngorsimasunut taamaattorli 67-inik ukiulinnut, 350 kr. akiliutigineqassapput.”
 - 6) Eqqartuussisarnermik inatsisip, pillasarnermik inatsisip, aqqusinertigut angallannermut inatsisip aamma nunani allamiunut inatsisip allannguutaat pillugit inatsit nr. 385, 20. maj 1992-imeersukkut (Unnerluussisussaataitat ilusilersugaanerat) taamanikkut politiit suliassaasa imaluunniit naalagaaffiup eqqartuussisorisuisa suliassaasa akornanni immikkoortitsisarneq atorunnaarpoq. Peqatigitillugu eqqartuussisarnermik inatsimmi eqqartuussivinni suliarinninnermi ingerlatseriaatsit pillugit malittarisassat allanngortinneqarput. Malittarisassat tassaniittut eqqartuussisarnermik inatsisip 4. bogiani allassimapput.
 - 7) Maanna eqqartuussisarnermik inatsisip kapitaliini 69, 70, 73 aamma 74.
 - 8) Inatsisip allannguutaa § 1, imm. 3, aamma § 4a-mut tunngavoq.
 - 9) Peqqussut nr. 753, 20. august 1994-imeersukkut, allanngortinneranut inatsisitaata § 6-ia passimut inatsimmut tunngasoq §§ 1 aamma 4a, Kalaallit Nunaannut atuutilersinneqarpoq.

Peqqussut nr. 324, 26. april 1996-imeersukkut, allanngortinneranut inatsisitaata § 6-ia aamma Savalimmiunut atuutilersinneqarpoq.

- 10) Inatsisip allannguutaa § 4a, imm. 1 aamma 3-mut tunngavoq.
- 11) Allanngortinneranut inatsisip § 6-ia § 4a, imm. 1 aamma 3-mut tunngasuuvoq.
- 12) Inatsisip allannguutaa § 4a-mut tunngavoq.
- 13) Allanngortinneranut inatsisip § 2-a passimut inatsisip § 4a-vanut tunngasuuvoq.
- 14) Inatsisip allannguutaa § 5, imm. 1-mut tunngavoq.
- 15) Allanngortinneranut inatsisip § 12-ia passimut inatsisip § 5, imm. 1-imut tunngasuuvoq.
- 16) Inatsisip allannguutaa § 2a-mut tunngavoq.
- 17) Inatsisip allannguutaa § 4a, imm. 4-mut tunngavoq.
- 18) Allanngortinneranut inatsisip § 2-a passimut inatsisip § 4a, imm. 4-mut tunngasuuvoq.
- 19) Peqqussut nr. 1390, 12. december 2007-imeersukkut, allanngortinneranut inatsisitaata § 2-a passimut inatsimmut tunngasoq § 4a, Kalaallit Nunaannut atuutilersinneqarpoq. Peqqussut nr. 1391, 12. december 2007-imeersukkut, allanngortinneranut inatsisitaata § 2-a aamma Savalimmiunut atuutilersinneqarpoq.
- 20) Inatsisip allannguutaa § 4a, imm. 1 aamma 3-mut tunngasuuvoq.